



Publicaziuns dalla vischnaunca, jamna 45

Lubientschas da baghegiar

L'istanza da baghegiar ha concediu suandontas lubientschas da baghegiar:

Nr. 2016 – 1066.000

Vischnaunca Disentis/Mustér, Via Cons 2, 7180 Disentis/Mustér, Corporaziun d'aua Spina da Vin, Caum postal 132, 7180 Disentis/Mustér, Repower AG, Via dil Glogn 22, 7130 Ilanz; novs conducts d'avertura – electricitad, aua e canalisaziun – per la fracziun da Cavardiras en cumbinaziun cun la procedura da runcada; proprietaris da terren tenor plan davart igl acquist da dretgs naven da Pardiens (Disla) entochen Cavardiras, 7180 Disentis/Mustér.

Nr. 2017 – 1040.000

Vischnaunca Disentis/Mustér, Via Cons 2, 7180 Disentis/Mustér; stabiliment per la produenziun tecnica da neiv, parcelas 2888, 2879, 3351, 3352 a Fontanivas, Sars e Sonduritg, 7180 Disentis/Mustér.

Uffeci da baghegiar Disentis/Mustér

Scaldaments mobils el liber

Bulius da scaldar, radiaturs, radiaturs d'infratgietschen etc.

Sebasond sin art. 11, al. 2 dalla lescha cantunala d'energia en cumbinaziun cun art. 33 dall'ordinaziun cantunala d'energia ha il departament da construcziun, traffic e selvicultura dil Grischun relaschau suandonta disposiziun:

1. Per mintga apparat da scaldar mobil – gas, electricitad ed ieli – che vegn duvraus el liber per intents commercials e che ha ina prestaziun da scaldar da maximalmein 14 kW, sto vegnir cumpensau ina tonna CO₂. Per apparats cun ina prestaziun da sur 14 kW e cun ina prestaziun da scaldar maximala da 28 kW sto vegnir cumpensau duas tonnas CO₂ e per apparats cun ina prestaziun da scaldar maximala da sur 28 kW sto vegnir cumpensau treis tonnas CO₂ e.a.v. Silmeins 20% dall'immissiun CO₂ sto vegnir cumpensada en Svizra. Per scaldaments en tenda valan las medemas pretensiuns sco pils scaldaments el liber.
2. Per mintga tonna che sto vegnir cumpensada sto vegnir taccau ina vignetta vid igl apparat da scaldar. Ina vignetta vala mintgamai in onn naven digl 1. Da settember entochen ils 31 d'uost. L'obligaziun da cumprar ina vignetta exista naven dall'emprema gada ch'igl apparat da scaldar mobil vegn mess en funcziun durant la perioda da scaldar respectiva.
3. La cumpensaziun dall'immissiun da CO₂ succeda entras il possessur ni entras la vischnaunca.
4. Sch'ils possessurs cumpenseschan sezs l'immissiun da CO₂, vegn la vignetta concedida gratuitamein entras la vischnaunca. La cumpensaziun sto vegnir cumprovada cun in certificat d'ina interpresa specialisada sil sector dalla cumpensaziun da CO₂ (p.ex. myclimate). Per apparats da scaldar electrici sa l'obligaziun da cumpensar l'immissiun da CO₂ era vegnir ademplida, sch'ei vegn applicau – per mintga tonna CO₂ che sto vegnir cumpensada – cumprovadamein 4500 kWh d'electricitad ch'ei vegnida producida cun energias regenerablas.
5. Sch'ils possessurs cumpenseschan buca sezs l'immissiun da CO₂, ston els cumprar tier la vischnaunca ina vignetta per mintga tonna CO₂ che sto vegnir cumpensada. Il prezi per vignetta importa frs. 60.–.
6. Las vischnauncas impundan igl entir recav dalla vendita da vignettas per cumpensar l'immissiun da CO₂. Igl uffeci d'energia e traffic metta a disposiziun in agid d'execuziun per las vischnauncas.
7. Per decretar sancziuns en cass da cuntravenziuns, en special incassar multas, ein las vischnauncas responsablas (art. 36 s. LEG). Las vignettas san vegnir retratgas tier l'administraziun communal.

Administraziun communal

Parcadi sutterran a Sogn Gions

Affittaziun

La vischnaunca posseda el center dil vitg, el sutterran dil Center da sanadad Puntreis, entgins parcadis. Quels san vegnir affittai naven d'immediat ni tenor cunvegrientscha per 120 francs/meins. Interessents che gavischan d'affittar in parcadi san bugen s'annunziar tier igl uffeci da baghegiar, caum postal 57, 7180 Disentis/Mustér ni per e-mail: baghegiar@disentis.ch.



Suprastonza communal

Controlla da habitonts

Mortori

Giuseppa Schmed-Monn, naschida ils 7 da fenadur 1914, morta ils 8 da november 2017

Vischinadi Segnas/Mumpé Tujetsch

Invitaziun alla radunonza generala da **sonda, ils 2 da december 2017** allas 19.30 ell'ustria «Cresta» a Segnas

Tractandas

1. beinvegni
2. elecziun dad in dumbravuschs
3. prelecziun ed approbaziun dil protocol
4. orientaziun president
5. rendaquen e rapport dils revisurs
6. fixar tscheins per diever zona
7. program da lavur
8. deliberaziun da damondas e propostas
9. varia

Cordialmein envida

la suprastonza dil vischinadi Segnas/Mumpé Tujetsch

Suenter la radunonza ha liug la radunonza generala Uniun da Cascharia e Fuorn Segnas.

Uniun da Cascharia e Fuorn Segnas

Invitaziun alla radunonza generala da **sonda, ils 2 da december 2017**, allas 20.30 suenter la radunonza da vischins ell'ustria «Cresta» a Segnas

Tractandas

Beinvegni

1. Elecziun da dus dumbravuschs
 2. Prelecziun ed approbaziun dil davos protocol
 3. Rapport dil president
 4. Proceder futur cun il fatg dall'uniun
 5. Prender decisiuns sin ulteriuras propostas
 6. Varia
- A stedia participaziun envida Vossa suprastonza.

Il president, Edwin Deflorin

Di dallas portas aviartas Sut Gliendas

Habitadi per giuven e vegl

Dumengia, ils 3 da december 2017 denter las 11.00 e las 15.00 envida la Sut Gliendas SA la populaziun ed interessai da prender envesta dalla surbaghegiada Sut Gliendas, Via Sogn Gions a Mustér.



Pro Juventute Cadi

Di dil dretg dils affons internaziunal 20-11-2017, a Mustér. Kino: «Gregs Tagebuch 4 – Böse Falle» (gratuit)
mesjamna, ils 22-11-2017, allas 13.45 en halla Cons

Vischinadi d'Acletta

Radunonza generala dil vischinadi d'Acletta

dumengia, ils 19 da november 2017, allas 14.00 ella «Stiva Sogn Placi» en sala reservada pil vischinadi d'Acletta. Suenter la radunonza envida la suprastonza las convischinas ed ils convischins tier ina viseta communabla el museum. Alla fin serendin nus ella «Stiva Sogn Placi» tier petta e caffè.

Tractandas

1. Beinvegni
2. Elecziun dils dumbravuschs
3. Prelecziun ed approbaziun dil protocol
4. Rapport annual dil president
5. Render quen, rapport dils revisurs
6. Elecziuns
7. Program da lavur
8. Varia

La suprastonza selegra sin Vossa participaziun.

La suprastonza dil vischinadi d'Acletta

Historias – Versets – Giugs da detta

Mesjamna, ils 29 da november 2017 dallas 9.00–9.30 per mummas ed affons pigns entochen treis onns. Vegni e tedlei versets, historias ni giugs da detta pils pigns. Tier nus anfleis Vus cudischs, films e portatuns per l'entira famiglia.
Cun ils pli cars salids e sin seveser tochen gleiti.

Maxi, la tartaruga ed il team

dalla Biblioteca popolare Disentis/Mustér e contuorn

Uniun da dunnas Disentis/Mustér

Fiera da Nadal, sonda, ils 25 da november 2017 dallas 13.30–20.00

Stans: Nus selegrein da far in beinvegni a varga 40 expositurs/-as. Ils stans vegnan endrizzai sil plaz scola, sil plaz avon halla Cons sco era sil plaz avon il Center da sanadad Puntreis. Duront il temps d'exposiziun ei la via Cons serrada per il traffic naven dalla fatschenta Arco entochen ils parcadis visavi la baselgia S. Gions.
Zambergiar latiarnas 14.00–16.30 (Til da latiarnas 17.30). Ensemen cun ils affons zambregian nossas dunnas dil ressort affons latiarnas el Center da sanadad Puntreis. Allas 17.30 suonda il til da latiarnas per in e scadin.

Aunghel da Nadal: Cun quella acziun vulein nus dunnas sustener personas basignusas el cantun Grischun. Commembras da noss'uniun han zambergiu cun gronda premura aunghellets. Bugen fagein in beinvegni a Vus sin nies stan. Engraziel fetg per Vies sustegn!

Ustria: Duront il temps da fiera ei l'ustria en halla Cons aviarta. Sper bubrondas purschin nus era pettas, suppa da giutta e hot dogs. Vegni e gudi in per bialas uras – nus selegrein sin Vossa viseta.

Uniun da dunnas Disentis/Mustér

Gruppa da seruschnar/termagliar

La gruppa da seruschnar/termagliar dat la caschun als affons pigns ed als geniturs da s'entupar, paterlar e termagliar. Tut ils affons entochen treis onns (cun fargliuns e geniturs) ein cordialmein beinvegni allas sentupadas meinsilas.



Las sentupadas duessen plinavon era far queidas als affons da visitar pli tard la gruppa da termagliar Artgin che ha liug el medem local nua ch'ils affons stattan persuls duas uras cun las menadras, e quei inaga ad jamna. Pils affons eis ei sco d'entrar ella tiara dalla cucagna cun massa novs termagls, e tut quei da cumpi-
gnia. Vegni e mirei, nus selegrein sin vossa viseta.

Proxima sentupada: **mardis, ils 28 da november 2017**

Temps: 14.30–16.00

Liug: Casa da scola Segnas, local Artgin, ella emprema alzada

Prender cun: marena e scalfins

Ulteriuras informaziuns e datums anfleis Vus sut www.uddm.ch

Cordialmein envida *Uniun da dunnas, ressort affons*

Fiera da Nadal – La biblioteca ei aviarta

A caschun dalla fiera da Nadal **sonda, ils 25 da november 2017**, ei la Biblioteca populara Disentis/Mustér e contuorn aviarta dallas 14.00–16.00. Nus presentein nossas medias per advent e Nadal en in contuorn pascheivel, e la decoraziun cun lavurs da zambergiar d'affons dalla scola da Mustér procuran per in'atmofera da Nadal per quell'exposiziun.

Encuris vus aunc ideas per in schenghetg? Cun in abbonament digl onn per famiglias (50.–) ni personas singulas (30.–) da nossa biblioteca regaleis vus in entir onn plascher.

Nus selegrein sin vossa viseta en nossa biblioteca.

Il team dalla biblioteca

Uniun purila Mustér

Radunonza generala, **venderdis, ils 24 da november 2017** allas 20.15 en cafeteria dil Center da sport e cultura Mustér.

Cordialmein envida la suprastonza.
